



## 消失个學校

逐年 8 月中旬還放等避暑，小學就會為著月底个開學無閒直掣、鬧熱起來。民國 83 年，有一個學校摻大家無共樣，一直到開學還恬索索仔，無聲無氣，就看著幾間教室孤孤栖栖企在青山綠水中。

民國 60 年，佢摻三個同學分發到新竹北埔个內豐國小，這係一隻紈在山寶肚个學校，下車後還愛行歸點鐘彎彎幹幹、礫礫砵砵个山路正到得到。毋過，路个一片係滿山又高又直个杉仔樹，另一片係滿遍大石細石个大坑壠，山青水清，人就像行在圖畫肚，一滴就無試著辛苦，還過有啾啾滾个鳥聲、嘩啦嘩啦个水聲做伴，心情特別鬆爽。

除了校長、主任外，佢兜七個先生全部戴在學校，一群後生人共下，生活過著多姿多采，日時頭摻純真个細人仔共下上課、遊戲；臨暗仔在恬靜个山路散步、看夕照；暗晡頭在辦公室改簿仔、準備教材；睡目前打打嘴鼓、聽聽音樂。在偏僻个山肚，日仔過著充實又逍遙。佢个青春年華留在佢最愛个內豐！

學校總共 6 班，學生仔正成百儕定，師生親切到就像兄弟姐妹，常常一早落到辦公室，就看著學生仔摘來一大把帶等露水个野薑花，滿室清香，帶分佢兜一日个好心情。家長對先生个尊重還較難忘，見堵著過節就喊食飯、送飯來。畢業典禮該日，還揸等一擔一擔个魚魚肉肉、盆頭鉢仔來學校，煮到豐豐沛沛，分先生、家長、畢業生共下食一餐有笑聲、有目汁个謝師宴。內豐个人情味長留在佢个心肝肚！

內豐係佢第一個教書个學校，也係佢尋著一生个伴，結婚降子个學校。對內豐，佢个感情放最重、最深，離開後還長下心心念念，無想著 83 年因為學生少就廢忒咧。廢校後佢識轉去一擺，看著當初親手作个假山、花園，早就花死草塞咧！學校也變到爛爛攪攪、全無人煙。行啊行、看啊看，迷痴中像人還聽著學生仔清亮个笑聲，也像人還鼻著野薑花芬芳个香味，還有佢兜有講有笑个身影。仰般一瞞目就無聲無哨、人去樓空咧！目汁強強忍毋核，煞煞跋起腳就走。再見啦，佢个內豐！再見啦，佢跔等內豐消失个青春！

作者：張美容

### ☆詞彙學習☆

【山寶肚】san` deu` du`：山裡面。

【像人】ciong` ngin：好像。

【到得到】do` ded do`：到得了。

【無聲無哨】mo shang` mo sau`：無聲無息。

【作】zog：修築、建造。

【跋起腳】bag hi` giog：提起腳。

【草塞】co` sed：雜草叢生。

### ☆文法學習☆

【成百儕定】shang bag sa tin+：大約才一百人。定，意為「而已」，用來限定數量、頻率、範圍等，置於子句最末。也可說「定定」。

例 1：佢來兩擺定，還毋熟路。(他才來兩次，還不熟悉路線。)

例 2：佢食一碗定，就飽咧。(他才吃一碗，就飽了。)